

Gesa perjanjian Hutan Simpan Ayer Hitam dilanjut

● ROSELA ISMAIL | BERITA HARIAN

PUCHONG: Sultan Selangor Sultan Sharafuddin Idris Shah berharap perjanjian persefahaman mengenai Hutan Simpan Ayer Hitam antara kerajaan Selangor dan Universiti Putra Malaysia (UPM) dilanjutkan daripada 80 tahun kepada 999 tahun.

Baginda yang juga Canselor UPM bertitah langkah itu bagi memastikan fungsinya sebagai kawasan hijau, pusat pemuliharaan sumber genetik dan pusat penyelidikan Fakulti Perhutanan UPM dapat diteruskan selamanya.

“Kerajaan negeri perlu membantu pelbagai penyelidikan dan penemuan baru tenaga penyelidik dari UPM bagi memastikan kelangsungan proses pembelajaran dan pengajaran itu tidak terhenti separuh jalan.

“Berdasarkan kepada kekayaan dan kepelbagaian biologi di situ, beta berkenan hutan simpan itu dipelihara dan dilindungi daripada sebarang gangguan penggunaan yang merosakkan,” titah baginda merasmikan Pusat Pendidikan Perhutanan Sultan Idris Shah (SISFEC) di sini, semalam.

Turut hadir Menteri Pengajian Tinggi, Datuk Seri Mohamed Khaled Nordin dan bekas Perdana Menteri, Tun Abdullah Ahmad Badawi selaku Penasihat Landskap Malaysia.

Menerusi perjanjian persefahaman yang ditandatangani pada 7 Oktober 1996, UPM diberi kebenaran mengurus dan membangunkan hutan simpan seluas 1,176.1 hektar sebagai hutan pendidikan penyelidikan dan pengembangan perhutanan untuk tempoh 80 tahun.



SULTAN SHARAFUDDIN diiringi Mohamed Khaled (dua dari kiri) dan Abdullah melawat Hutan Simpan Ayer Hitam ketika merasmikan Pusat Pendidikan Perhutanan Sultan Idris Shah di Puchong, semalam.

Hutan itu kemudian dijadikan SISFEC yang siap sepenuhnya pada September 2011 dengan kemudahan seperti bangunan akademik, makmal, penginapan serta kemudahan rekreasi luar seperti tapak perkhemahan, sirkit rempuh halangan, padang paintball dan dinding memanjat.

“Pembelajaran mengecam flora dan fauna serta denai ilmu adalah

daya tarikan yang boleh meningkatkan kesedaran mengenai kepentingan pemeliharaan sumber hutan apabila pengunjung melawat pusat itu.

“Memandangkan sempadan luar hutan ini amat luas, beta berharap semua pihak termasuk penduduk yang tinggal berjiran dengan hutan ini dapat bersama-sama melindunginya daripada aktiviti yang boleh

merosakkan sumber hutan,” titah baginda.

Penduduk di sekeliling hutan ini titah baginda lagi, perlu menjadi mata dan telinga pihak Jabatan Perhutanan Negeri Selangor dan UPM dalam memberi maklumat mengenai sebarang aktiviti yang boleh merosakkan sumber hutan supaya tindakan yang sewajarnya dapat diambil dengan segera.